

بِسْمِ اللَّهِ الرَّحْمَنِ الرَّحِيمِ



Khutba Jummah

Hazrat Khalifatullah Munir. A. Azim (atba)

28 Février 2020
04 Rajab 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

Bane Attributs d'Allah (Pt.2)

Par la grâce d'Allah la semaine passé mo fine commence mo Khutba lors bane attributs d'Allah et mo remercier Allah (swt) beaucoup ki Li fine donne moi le *Tawfiq* pou continuer lors sa même sujet là, azordi aussi. Kan ou suivre le Khutba Jummah semaine passé ou pou comprend bien, ki concrètement pas fine mentionne Allah comme *Haqq* mais en fait kan ou guette So bane attributs, bé la vérité li inclue là-dans. Du point de vue de bane éloges, pas capave même concevoir aucaine mensonge pour Allah.

2^{ème} raison ki bane dimoune cause beaucoup menti c'est à cause la gourmandise. Ena beaucoup bane procès ki ena dans la cour concernant bane zaffaires di bien ou sois bane zaffaires d'emprunt et remboursement etc., ou sois bane zaffaires de dettes etc. Ene grande partie de sa bane « cases » [cas] là, li le résultat de bane menti ki bane dimoune causer à cause zot gourmandise.

Nous guette situation d'ene pays même, ou trouve à cause gourmandise de pouvoir, faire toute sorte kalité promesse pou vine au pouvoir, et là-dans beaucoup de bane mensonges dérouler pendant campagne électorale, critique

lotte partie, jette la boue, faire toute sorte kalité magouille kot bien souvent ena bane élections faire dans ene pays ki ena aussi bane maldonne couma dire li vine ene bagarres : kot ena zot jette la boue, faire campagne, rencontre l'autre partie attention li vine au pouvoir, ena bane promesses ki faire avec bane électorat, ena beaucoup de mensonges aussi ki aller. Tous sa là c'est résultat de gourmandise, envie gagne pouvoir pou reste au pouvoir, faire *majakaro* couma nous dire et là-dans le peuple ki souffert beaucoup encore pendant cinq ans kot zot embête dimounes, cause menti à cause zot gourmandise.

Maintenant ene Être ki possède tout et ki pas dépanne lors personne et ki au contraire zot tous dépanne lors Li, bé ki utilité ena pou ki Li cause menti ? Li déjà Maître de l'univers et de ce fait l'aspect même de gourmandise enlever nette.

De la même façon ou capave pense lors bane les autres attributs aussi. En donnant bane conseils Quran Shariff faire nous comprend, faudrait pas zot dévore zot dibiens entre zot par bane faux moyen. Le mot ki fine servi c'est '*Baatil*' et li ena plusieurs signification, mais signification principale c'est mensonge. Donc, li veut dire ki pas bizin ou cause menti et dévore bane dibiens les autres. Li veut aussi dire ki ou pas bizin dévore bane dibiens à travers bane moyens ki Allah (swt) fine défanne. Pas bizin ou mange dibiens *Haram*.

Donc, dans les deux cas so signification principale c'est mensonges. Pou la cause de mensonge ou consomme bane z'affaires *Haram*, bane mauvais z'affaires. Sa en fait ena connexion avec gourmandise. Sa gourmandise là faire ene dimoune vine malhonnête et kot dimounes même ena bane mauvais regard lors li et kot-kot li passer, dimounes cause mauvais pou li. Par so bane mauvais actions ki li fine faire et par la gourmandise ki li ti ena, sa fine amène li dans ene grand déshonneur lors sa la terre là et dans l'au-delà aussi. Finalement, li pas possède la terre ni le ciel, ni sa l'univers là etc. Li ena bane manquements et pou enlève sa bane manquements là [à so niveau, dans so façon] li cause menti. Mais Allah ki le Maître de tout l'univers, Qui donner sans ki nous demander, bé alors ki nécessité Li ena pou cause menti ? Mensonge pas appliquer même lors Li.

Même lors bane l'instruction ki Li donne So bane Messagers, Allah (swt) jamais cause menti. Mensonge jamais même pas appliquer lors Li. Li au-delà de tout mensonge. Ene l'exemple ki mo capave donne ou, pareil couma mo fine dire zot plusieurs fois dans le passé, ena l'histoire de Hazrat Yusuf (as), et couma Allah fine

faire ene plan pour li et donne li l'instruction pou mette coupe léroi dans sac so propre frère pou ki bane soldats royales capave arrête li lor sa *bahana* (excuse) là et alors d'après la loi du pays, so frère pou capave reste avec li sans ki personne parmi so bane demi-frères douter, ki c'est li-même zot frère Yusuf (as). Allah Li *Al-Haqq*. C'est Li ki faire la loi et c'est Li ki conne mieux comment pou applique So la loi et établir la vrai vérité, ene tel la vérité ki pou amène la paix au niveau de la famille et au niveau de la société, et ki pou fer bane ki fine fer du tort réalise zot bane erreurs. En apparence, li capave paraite ki Hazrat Yusuf (as) fine cause menti, et si ene dimoune guette sa dans sa point de vue là, li pou capave penser, « *Bé guette sa ! Ene prophète même fine cause menti. Li même li prend coupe léroi et mette sa dans sac so frère et accuse li !* » Bé ki Allah dire ?

« Kazaalika kid-naa li-Yuusuf. Maa kaana liya'-khuza 'akhaahu fii diinil-maliki 'illaaa 'ayy-yashaaa-'allaah. Narfu-'u dara-jaatim-man-nashaaa': wa fawqa kulli zii-'ilmin 'Aliim. »

Nous (Allah) ti faire sa plan là pou Yusuf. Li pas ti capave maille so frère, d'après la loi léroi, seulement Allah ti oulé sa coumsa. Nous donne bane degrés de connaissance à bane ki Nous oulé. Mais plus haut ki tout ki ena connaissance, ena ene grand Connaisseur (Allah). (Yusuf 12 : 77)

Donc, c'est Allah ki incarne la vérité et la connaissance. Dimoune, avec faible connaissance ki li ena pas pou capave comprend entièrement bane façon d'agir d'Allah et souvent des fois li blâme Allah. Mais Allah Li au-delà de tout blâme et de tout mensonge.

Et d'ailleurs, nous trouver ki c'est par le mensonge de bane madames – pou protégé zot propre l'honneur et l'intérêt – ki Hazrat Yusuf (as) ti alle dans prison. A sa l'époque là léroi ki ti pé régner, ensam avec Al-Aziz et tous bane ki ti fine accuse ene innocent (Hazrat Yusuf), alors zot politique ti fer zot prend sa décision là – ene décision basé lors mensonge – afin ki dimounes oublier sa incident là. Mais ki Allah fine fer ? En étant *Al-Haqq*, et pou rétablir l'honneur de So prophète, après plusieurs l'année, Li fine établir Yusuf (as) comme ene ministre de léroi ki ti pé régner à sa l'époque là, kot Yusuf (as) connu comme « *Al-Aziz* », et la vérité éclater au grand jour kot zot tous alle conner ki c'est madame de celui ki ti acheter li (Zuleikha) ki ti cause menti.

Ene lotte raison derrière le mensonge de bane dimounes c'est la frayeur de ranne compte, et que ce soit dans l'Est ou l'Ouest, la majorité de mensonge causer de peur ki attrape zot, pareil couma dans le cas de Zuleikha. Zot peur la punition et à cause de sa zot cause menti.

Kan ene zenfant fine faire ene erreur ou sois kan ene quelqu'un fine commette ene vol ou sois fine commette ene crime ou n'importe quel autre situation, bé zot cause menti à cause zot peur sa règlement de compte là. Zot peur sa arrestation là. Mais ene prophète d'Allah pas peur dimounes. Li établir li lor la vérité pareil couma so Créateur – Li suivre l'instruction divine. Hazrat Yusuf (as) ti préfère alle dans prison au lieu faire ene acte illégale ki pou attirer la colère d'Allah et la honte.

Si dimounes pas ti pou ena aucune compte à rendre, bé zot pas ti pou cause menti. Et en fait sa ena ene profond connexion avec le sujet de *Hamd*. Si dans ene réunion ou dire pé gagne de très bon parfum, ki sanlà fine mette *Attar* (parfum) ou sois ene extra bon parfum? Bé à ce moment là bane dimounes capave cause menti et zot dire ki c'est zot ki fine metté. Mais si ou dire ki pé gagne mauvais l'odeur, bé personne pas pou cause menti et dire ki c'est zot sa. Parski zot peur ! Au contraire même si c'est zot sa, zot pou cause menti et dire ki c'est pas zot.

Donc, mensonge profondément lier avec *Hamd* et le mal aussi. Li démontrer contraste ki ena entre Allah [et So bane vrais serviteurs] et bane les autres dimounes ki pas établir zot lor la vérité et ki rode bane fausses louanges pou tini zot l'honneur dans la société. Dans certains cas bane dimounes cause menti pou gagne éloge et dans d'autres cas bane dimounes cause menti pou sappé avec bane mal. Et le prochain pas de sa c'est le règlement de compte, kot ena pou gagne punition, et alors là ene dimoune pas capave cause menti et dire ki li fine commette ene z'affaire ki en fait ki pas fine commette (kot li innocent). Au contraire là, c'est ene coupable ki pou cause menti et dire ki li pas fine commette tel chose et li cause menti parski li conné ki li pou gagne punition pou tel z'affaires. Sa sujet là couma mo ti pé dire zot ena bel connexion avec véracité de bane prophètes. Kan bane prophètes faire ene revendication, bé zot gagne bane bel-bel punition de côté bane peuples kot sa bane dimounes là attaque zot l'honneur. La société rejette zot bane valeurs et l'honneur ki la société même ti donne zot avant ki zot faire zot revendication.

Eski ou croire ki ene Serviteur d'Allah, ene Messenger d'Allah pou cause menti juste pou gagne l'honneur ou sois pou sappé avec bane punitions ou sois par gourmandise? Pourtant avant sa, bane peuples là même donne zot bane bel valeurs et ena bel l'espoir lors zot. Pareil couma Hazrat Saleh (as) So peuple ti dire li ki « *Nous fine place nous l'espoir lors toi* ».

Donc, pou chaque prophète li pareil. Pou Hazrat Massih Ma'oud (as) aussi li pareil. Bane dimoune ti place grand l'espoir lors li pareil kan Hazrat Sufi Ahmad Jaan Sahib ti joine li, li dire : *Nous bane malades. Nous ena nous regard tourner vers toi. Pour la cause d'Allah déclare toi comme le Messie.* Donc ene dimoune cause menti pou gagne éloge. Ou sois pou accompli so gourmandise de gagne bane dibiens. Mais si ene dimoune faire ene revendication kot so l'honneur aussi aller, so dibiens aussi aller, li gagne battu pour sa. Li gagne bane punitions malgré ki li pas fine commette aucaine crime, ni fine faire magouilles, ni fine mette la main dans tiroir (fraude), bé faudrait quoi ki li ene fou même pou li cause menti. Mais si ene dimoune ki avant so revendication li ti ena tout et quant même sa li faire revendication, bé eski ou capave qualifier ene tel dimoune comme ene menteur ?

Mo raconte zot ene anecdote pendant ki mo ti pé faire *tabligh* dans Jamaat Ahmadiyya, kan mo ti ene *Local Missionary* ki ti pé travail à Maurice et lors bane l'îles avoisinantes. Mo ti pé travail à l'île de la Réunion, et pendant ki mo ti pé faire *tabligh*, mo ti joine ene *Maulvi*, ene mauvais *Kattar* (grand opposant Hazrat Massih Ma'oud (as)). Kan li ti pé cause are moi devant so bane membres de so Jamaat li ti pé cause partout lors bane revendications de Hazrat Massih Ma'oud (as), et li pas ti conner ki c'est exactement bane même objections ki bane Chrétiens lever contre Hazrat Muhammad (saws). Bane Chrétiens zot dire ki avant Hazrat Muhammad (saws) – *Nawzobillah min Zalik* – ti cause ene ti menti, ensuite ene 2^{ème} menti et ene 3^{ème} menti etc. Avant li ti dire ki li pas supérieur à Moïse et li fine juste vini pou averti bane la Mecque seulement ; au contraire li ti dire ki li fine vine avertir so bane proches seulement. Mais ensuite so revendication fine augmenter et li fine dire ki li fine vini pour bane *Ahlé Kitaab* (Gens du Livre), et ensuite so revendication fine augmenter encore kot finalement li dire ki li fine vine pour toute l'humanité. Alors zot dire ki li fine cause menti et doucement doucement li fine grandi dans so mensonge.

Donc, *Maulvi* là pas ti ena assez connaissance lors l'histoire de la religion. Li pas conner même et li pas conner saki fine écrire dans bane livres là. Li fine seulement

lire ceci ki avant Hazrat Massih Maoud (as) fine dire ki li ene Envoyé ensuite, li fine dire ki li Mahdi et après li fine dire ki li-même sa 2^{ème} Jésus - Isa (as) ki zot pé atanne là ; « *Mo même Krishna* » etc. Alors, li ti pé dire bane dimounes dans so Jamaat : *Zot trouver couma Hazrat Mirza Ghulam Ahmad (as) ene menteur ?!*

Mo fine dire sa Maulvi là dire moi ene zaffaire: *Si mo prend ou mo amène ou dans bazar central et mo faire sa annonce là ki ene quelqu'un fine coquin sa, li pou gagne 100 coûte souliers lors so la tête. Eski sa l'heure là ou pou faire ene faux revendication ki : Oui, oui c'est moi ki fine coquin sa?* Mo dire li : *Même voleur là pas pou dire ki li fine coquin, parski li peur sa punition là, et mo fine dire li ki : Pour sapper avec bane punitions, bane dimounes cause menti, mais maintenant kan ouvertement ou conner ki bane dimounes pou faire ou souffert, bé ki utilité ena pou ou cause menti ? Et lors là li [Hazrat Massih Ma'oud (as)] faire ene revendication, ene après l'autre ;* et mo fine dire li ki : *Eski sa tiguine raisonnement là aussi ou péna ?* En fait ou pé guette bane signes de Hazrat Massih Ma'oud (as) avec bane vues de bane objections. Kan li ti faire so revendication ki li ene Envoyé d'Allah, bé déjà bane musulmans ti fine vine so l'ennemies. Kan li déclare li comme le Mahdi li gagne persécutions de la part de sa bane musulmans là. Astère là eski ou capave penser ki li faire ene lotte « fausse déclaration » et dire ki Bon Dieu péna aucaine garçon, ki céki zot pé dire Bon Dieu So garçon là – Jésus, ki zot prend comme fils de Dieu – li fine mort.

Cette fois-ci li faire bane Anglais et bane Chrétiens en générale vine so l'ennemies et li déclarer ki li Krishna. Li pou cause ene lotte menti ? Déjà zot tous pé vine so l'ennemies et pé persécute li, et si tout sa ti mensonges, eski li ti pou persister dans so mensonges pour faire bane *Arya* vine so l'ennemies en confrontant Pandit Lekh Ram ? Là aussi li continuer avec bane Sikhs et li dire ki Hazrat Baba Nanak ti ene musulman.

Mo fine dire sa Maulvi là : *Eski ou péna ene ene tiguite raisonnement pou trouver ki li ene vrai prophète ? Eski li ti pou content cause tous sa menti là kot tous dimoune vine so l'ennemies et oppose li, joue li gros, gros bêtise, faire toutes sortes qualités caricatures lors li, abaisse so l'honneur et so dignité, kot so la vie vine en danger ? Là-bas bane ki commette crimes, coquin etc. pé cause menti pou protège zot contre bane punitions atroces. Mais quant à li [Hazrat Massih Ma'oud (as)] kot so la vie, la vie so famille en danger, kot zot rode touye li - Dans so la mort naturel même, zot fine critique li ; zot dire ki li fine mort dans*

latrine (pli mauvais ki toilette ki nous ena de nos jours). Bane ki fine critique li là lors sa sujet là dans zot ventre ki ena ? Perles, diamants ? Péna malpropreté ? Kan zot mort, baigne zot, tire zot gaz, pèze lors zot ventre, eski c'est perles, diamants ki sorti ? Pas malpropreté ? Et lors là zot mette toutes sorte kalités blâmes lors li et même dire ki li fume l'opium !

Ou trouver kan ene prophète vini de côté d'Allah, so la vie pas vine facile di tout, li passe par plusieurs épreuves. Azordi dans sa siècle là l'histoire se répète kot Allah (swt) fine élève sa humble serviteur là, et mo fine gagne même question avec bane Ahmadis. Kot avant mo ti pé bizin faire les zot comprend, azordi tous céki mo fine fek dire en défense pour Hazrat Massih Ma'oud (as), bane même zaffaires saletés zot pé dire lors moi et azordi jours mo pé bizin faire bane Ahmadi même comprend ki à chaque fois ki ene prophète vini li pou coumsa. Mais ki tambour mo capave tapper pou fer sa bane raisonnements et arguments là encrer dans zot fermement kot tout voile enlever de zot lizié ?

Insha-Allah, mo pou continuer sa Khutba là la semaine prochaine. Ki Allah donne zot le *Tawfiq* et *Hidayat* pour accepter la vérité et médite lors la grandeur d'Allah et bane plusieurs signes et manifestations ki Li fine manifester dans sa siècle là, comme de tout temps pour faire la vérité éclater. *Insha-Allah, Ameen.*